



清刻龍藏佛說法變相圖

永嘉集序

唐 慶州刺史 魏靜述

俊十

聞夫慧門廣闢理絕色相之端覺路遙登跡  
 晦名言之表悲夫能仁示現應化無方開妙  
 典於三乘暢真詮於八部所以發揮至蹟懸  
 梵景於昏衢光闡大猷汎禪波於欲浪是以  
 金棺揜耀玉毫收彩孤標靈鷲之英獨負成  
 麟之業者其唯大師歟大師俗姓戴氏永嘉  
 人也少挺生知學不加思幼則遊心三藏長  
 則通至大乘三業精勤偏弘禪觀境智俱寂  
 定慧雙融遂使塵靜昏衢波澄玄海心珠道  
 種瑩七淨以交輝戒月悲華耿三空而列耀  
 加復霜松潔操水月虛襟布衣蔬食忘身為  
 法愍傷舍識物物斯安觀念相續心心靡間  
 始終抗節金石方堅淺深心要貫華慙潔神

徹言表理契寰中曲已推人順凡同聖則不  
起滅定而秉護四儀名重當時道扇方外三  
吳碩學輻湊禪塔八表高人風趨理窟靜往  
因薄宦親承接足恨未盡於方寸俄赴京畿  
自爾已來幽明遽隔永慨玄眸積瞿忽喪金  
鉀欲海洪濤遡沈智檝遺文尚在龕室寂寥  
嗚呼哀哉痛纏心腑所嗟一方眼滅七衆何  
依音德無聞遠增悽感大師在生凡所宣紀  
總有十篇集爲一卷庶同歸郢悟者得意忘  
言耳今畧紀斯文多有謬誤用俟明哲非者  
正之

永嘉集

唐 慎水沙門 玄覺述

大章分爲十門

慕道志儀第一夫欲修道先須立志及事師儀則彰乎軌訓故標第一慕道儀式

戒橋奢意第二初雖立志修道善識軌儀若

後十

三業橋奢妄心擾動何能得定故次第二明戒橋奢意也

淨修三業第三前戒橋奢畧標綱要今子細檢責令麤過不生故次第三明淨修三業戒乎身口意也

奢摩他頌第四前已檢責身口令麤過不依次須入門修道漸次不出定慧五種起心六種料簡故次第四明奢摩他頌也

毗婆舍那頌第五非戒不禪非禪不慧上既

修定定久慧明故次第五明毗婆舍那頌也優畢又頌第六偏修於定定久則沈偏學於慧慧多心動故次第六明優畢又頌等於定慧令不沈動使定慧均等捨於二邊

三乘漸次第七定慧既均則寂而常照三觀

一心何疑不遣何照不圓自解雖明悲他未悟悟有淺深故次第七明三乘漸次也

事理不二第八三乘悟理無不窮窮理在事了事即理故次第八明事理不二即事而真用祛倒見也

後十

勸友人書第九事理既融內心自瑩復悲遠學虛擲寸陰故此第九明勸友人書也發願文第十勸友雖是悲他專心在一情猶本普故次第十明發願文誓度一切也慕道志儀第一

先觀三界生厭離故次親善友求出路故次  
朝晡問訊存禮數故次審乖適如何明侍養  
故次問何所作爲明親承事故次瞻仰無怠  
生慙重故次數決心要爲正修故次隨解呈  
簡爲識邪正故次驗氣力知生熟故次見病  
生疑堪進妙藥故委的審思求諦當故日夜  
精勤恐緣差故專心一行為成業故亡身爲  
法爲知恩故如其信力輕微意無專至麤行  
淺解汎漾隨機觸事則因事生心緣無則依  
無息念既非動靜之等觀則順有無之得失  
然道不浪階隨功涉位耳

戒憍奢意第二

衣食由來長養栽種墾土掘地鹽漬蠶蛾成  
熟施爲損傷物命令他受死資給自身但畏  
飢寒不觀死苦殺他活已痛哉可傷兼用農

功積力深厚何獨含靈致命亦乃信施難消  
雖復出家何德之有噫夫欲出超三界未有  
絕塵之行徒爲男子之身而無丈夫之志但  
以終朝擾擾竟夜昏昏道德未修衣食斯費  
上乖弘道下闕利生中負四恩誠以爲恥故  
智人思之寧有法死不無法生徒自迷癡貴  
身賤法耳

淨修三業第三

貪瞋邪見意業妄言綺語兩舌惡口口業殺  
盜姪身業夫欲志求大道者必先淨修三業  
然後於四威儀中漸次入道乃至六根所對  
隨緣了達境智雙寂冥乎妙旨云何淨修身  
業深自思惟行住坐卧四威儀中檢攝三愆  
無令漏失慈悲撫育不傷物命水陸空行一  
切含識命無大小等心愛護蠢動蚰飛無令

毀損危難之流慙慙拔濟方便救度皆令解脫於他財物不與不取乃至鬼神隨有主物一針一草終無故犯貧窮乞丐隨已所有敬心施與令彼安穩不求恩報作是思惟過去諸佛經無量劫行檀布施象馬七珍頭目髓

腦乃至身命捨而無悵我今亦爾隨有施與歡喜供養心無悵惜於諸女色心無染著凡夫顛倒爲慾所醉耽荒迷亂不知其過如捉華莖不悟毒蛇智人觀之毒蛇之口熊豹之手猛火熱鐵不以爲喻銅柱鐵牀焦背爛腸

血肉糜潰痛徹心髓作如是觀唯苦無樂華囊盛糞膿血之聚外假香塗內唯臭穢不淨流溢蟲蛆住處鮑肆厠孔亦所不及智者觀之但見毛髮爪齒薄皮厚皮肉血汗淚涕唾膿脂筋脉腦膜黃痰白痰肝膽骨髓肺脾腎

胃心膏膀胱大腸小腸生藏熟藏屎尿臭處如是等物一一非人識風鼓擊妄生言語詐爲親友其實怨妬敗德障道爲過至重應當遠離如避怨賊是故智者觀之如毒蛇想寧近毒蛇不親女色何以故毒蛇殺人一死一

生女色繫縛百千萬劫種種楚毒苦痛無窮諦察深思難可附近是以智者切檢三愆改往修來背惡從善不殺不盜放生布施不行姪穢常修梵行日夜精勤行道禮拜歸憑三寶志求解脫於身命財修三堅法知身虛幻無有自性色即是空誰是我者一切諸法但有假名無一定實是我身者四大五陰一一非我和合亦無內外推求如水聚沫浮泡陽焰芭蕉幻化鏡像水月畢竟無人無明不了妄執爲我於非實中橫生貪著殺生偷盜姪

穢荒迷竟夜終朝矻矻造業雖非真實善惡報應如影隨形作是觀時不以惡求而養身命應自觀身如毒蛇想為治病故受於四事身著衣服如裹癰瘡口食滋味如病服藥節身儉口不生奢泰聞說少欲深樂修行故經云少欲頭陀善知止足是人能入賢聖之道何以故惡道衆生經無量劫闕乏食叫喚號毒飢寒切楚皮骨相連我今暫闕未足為苦是故智者貴法賤身勤求至道不顧形命是名淨修身業云何淨修口業深自思惟口之四過生死根本增長衆惡傾覆萬行通相是非是故智者欲拔其源斷除虛妄修四實語正直柔軟和合如實此之四語智者所行何以故正直語者能除綺語柔軟語者能除惡口和合語者能除兩舌如實語者能除妄

語正直語者有二一稱法說令諸聞者信解明了二稱理說令諸聞者除疑遣惑柔軟語者亦二一者安慰語令諸聞者歡喜親近二者宮商清雅令諸聞者愛樂受習和合語者亦二一事和合者見聞諍人諫勸令捨不自稱譽卑遜敬物二理和合者見退菩提心人慙懃勸進善能分別菩提煩惱平等一相如實語者亦二一事實者有則言有無則言無是則言是非則言非二理實者一切衆生皆有佛性如來涅槃常住不變是以智者行四實語觀彼衆生曠劫已來為彼四過之所顛倒沈淪生死難可出離我今欲拔其源觀彼口業唇舌牙齒咽喉膺響識風鼓擊音出其中由心因緣虛實兩別實則利益虛則損減實是起善之根虛是生惡之本善惡根本由

口言詮詮善之言名爲四正詮惡之語名爲四邪邪則就苦正則歸樂善是助道之緣惡是敗道之本是故智者要心扶正實語自立誦經念佛觀語實相言無所存語默平等是名淨修口業云何淨修意業深自思惟善惡

第十

七

之源皆從心起邪念因緣能生萬惡正觀因緣能生萬善故經云三界無別法唯是一心作當知心是萬法之根本也云何邪念無明不了妄執爲我我見堅固貪瞋邪見橫計所有生諸染著故經云因有我故便有所因

我所故起於斷常六十二見見思相續九十八使三界生死輪迴不息當知邪念衆惡之本是故智者制而不隨云何正觀彼我無差色心不二善提煩惱本性非殊生死涅槃平等一照故經云離我我所觀於平等我又涅槃

繫此二皆空當知諸法但有名字故經云乃至涅槃亦但有名字又云文字性離名字亦空何以故法不自名假名詮法法既非法名亦非名名不當法法不當名名法無當一切空寂故經云法無名字言語斷故是以妙相絕名真名非字何以故無爲寂滅至極微妙絕相離名心言路絕當知正觀還源之要也是故智者正觀因緣萬惑斯遣境智雙忘心源淨矣是名淨修意業此應四儀六根所對隨緣了達入道次第云爾

#### 奢摩他頌第四

恰恰用心時恰恰無心用無心恰恰用常用恰恰無夫念非忘塵而不息塵非息念而不忘塵忘則息念而忘念息則忘塵而息忘塵而息息無能息息念而忘忘無所忘忘無所

忘塵遺非對息無能息念滅非知知滅對遺  
一向冥寂聞爾無寄妙性天然如火得空火  
則自滅空喻妙性之非相火比妄念之不生  
其詞曰忘緣之後寂寂靈知之性歷歷無記  
昏昧昭昭契本真空的的惺惺寂寂是無記

依十

寂寂非寂寂惺惺是亂想惺惺非若以知知  
寂此非無緣知如手執如意非無如意手若  
以自知知亦非無緣知如手自作拳非是不  
拳手亦不知知寂亦不自知知不可為無知  
自性了然故不同於木石手不執如意亦不  
自作拳不可為無手以手安然故不同於兔  
角復次修心漸次者夫以知知物物在知亦  
在若以知知知知則離物物離猶知在起  
知知於知後知若生時前知早已滅一知既  
不並但得前知滅滅處為知境能所俱非真

前則滅滅引知後則知知續滅生滅相續自  
是輪迴之道今言知者不須知知但知而已  
則前不接滅後不引起前後斷續中間自孤  
當體不顧應時消滅知體既已滅豁然如托  
空寂爾少時間唯覺無所得即覺無覺無覺

之覺異乎木石此是初心處冥然絕慮乍同  
死人能所頓忘纖緣盡淨聞爾虛寂似覺無  
知無知之性異乎木石此是初心處領會難  
為入初心時三不應有一惡謂思惟世間五  
欲等因緣二善謂思惟世間雜善等事三無

後十

九

記謂善惡不思聞爾昏住戒中三應須具一  
攝律儀戒謂斷一切惡二攝善法戒謂修一  
切善三饒益有情戒謂普度一切眾生定中  
三應須別一安住定謂妙性天然本自非動  
二引起定謂澄心寂怕發瑩增明三辦事定

謂定水凝清萬像斯鑑慧中三應須別一人  
空慧謂了陰非我即陰中無我如龜毛兔角  
二法空慧謂了陰等諸法緣假非實如鏡像  
水月三空空慧謂了境智俱空是空亦空見  
中三應須識一空見謂見空而見非空二不  
空見謂見不空而見非不空三性空見謂見  
自性而見非性偏中三應須簡一有法身無  
般若解脫二有般若無解脫法身三有解脫  
無法身般若有一無二故不圓不圓故非性  
又偏中三應須簡一有法身般若無解脫二  
有般若解脫無法身三有解脫法身無般若  
有二無一故不圓不圓故非性圓中三應須  
具一法身不癡即般若般若無著即解脫解  
脫寂滅即法身二般若無著即解脫解脫寂  
滅即法身法身不癡即般若三解脫寂滅即

法身法身不癡即般若般若無著即解脫舉  
一即具三言三體即一此因中三德非果上  
三德欲知果上三德法身有斷德通因斷惑  
而顯德故名斷德自受用身有智德具四智  
真實功德故他化二身有大恩德他受用身  
於十地菩薩有恩德故三種化身於菩薩二  
乘異生有恩故三諦四智除成所作智爲緣  
俗諦故然法無淺深而照之有明昧心非垢  
淨而解之有悟迷初入初心迷復何非淺終  
契圓理達始何非深迷之失理而自差悟之  
失差而即理迷悟則同其致故有漸次名焉  
復次初修心人入門之後須識五念一故起  
二串習三接續四別生五即靜故起念者謂  
起心思惟世間五欲及雜善等事串習念者  
謂無心故憶忽爾思惟善惡等事接續念者

謂串習忽起知心馳散又不制止更復續前  
思惟不住別生念者謂覺知前念是散亂即  
生慙愧改悔之心即靜念者謂初坐時更不  
思惟世間善惡及無記等事即此作功故言  
即靜串習一念初心者多接續故起二念懈  
怠者有別生一念慙愧者多即靜一念精進  
者有串習接續故起別生四念爲病即靜一  
念爲藥雖復藥病有殊總束俱名爲念得此  
五念停息之時名爲一念相應一念者靈知  
之自性也然五念是一念枝條一念是五念  
根本復次若一念相應之時須識六種料簡  
一識病二識藥三識對治四識過生五識是  
非六識正助第一病者有二種一緣慮二無  
記緣慮者善惡二念也雖復差殊俱非解脫  
是故總束名爲緣慮無記者雖不緣善惡等

事然俱非真心後十但是昏住此二種名爲病第  
二藥者亦有二種一寂寂二惺惺寂寂謂不  
念外境善惡等事惺惺謂不生昏住無記等  
相此二種名爲藥第三對治者以寂寂治緣  
慮以惺惺治昏住用此二藥對破二病故名  
對治第四過生者謂寂寂久生昏住惺惺久  
生緣慮因藥發病故云過生第五識是非者  
寂寂不惺惺此乃昏住惺惺不寂寂此乃緣  
慮不寂寂不惺惺此乃非但緣慮亦乃入昏  
而住亦寂寂亦惺惺非唯歷歷兼復寂寂此  
乃還源之妙性也此四句者前三句非後一  
句是故云識是非也第六正助者以惺惺爲  
正以寂寂爲助此之二事體不相離猶如病  
者因杖而行以行爲正以杖爲助夫病者欲  
行必先取杖然後方行修心之人亦復如且

必先息緣慮令心寂寂次當惺惺不致昏沈  
令心歷歷歷歷寂寂二名一體更不異時譬  
夫病者欲行闕杖不可正行之時假杖故能  
行作功之者亦復如是歷歷寂寂不得異時  
雖有二名其體不別又曰亂想是病無記亦

病寂寂是藥惺惺亦藥寂寂破亂想惺惺治  
無記寂寂生無記惺惺生亂想寂寂雖能治  
亂想而復還生無記惺惺雖能治無記而復  
還生亂想故曰惺惺寂寂是無記寂寂非寂  
寂惺惺是亂想惺惺非寂寂爲助惺惺爲正  
思之復次料簡之後須明識一念之中五陰  
謂歷歷分別明識相應即是識陰領納在心  
即是受陰心緣此理即是想陰行用此理即  
是行陰汙穢真性即是色陰此五陰者舉體  
即是一念此一念者舉體全是五陰歷歷見

此一念之中後十無有主宰即人空慧見如幻化  
即法空慧是故須識此五念及六種料簡願  
勿嫌之如取真金明識瓦礫及以偽寶但盡  
除之縱不識金金體自現何憂不得之  
毗婆舍那頌第五

夫境非智而不了智非境而不生智生則了  
境而生境了則智生而了智生而了了無所  
了了境而生生無能生生無能生雖智而非  
有了無所了雖境而非無無即不無有即非  
有有無雙照妙悟蕭然如火得薪彌加熾盛  
薪喻發智之多境火比了境之妙智其詞曰  
達性空而非縛雖緣假而無著有無之境雙  
照中觀之心歷落若智了於境即是境空智  
如眼了華空是了華空眼若智了於智即是  
智空智如眼了眼空是了眼空眼智雖了境

空及以了智空非無了境智境空智猶有了境智空智無境智不了如眼了華空及以了眼空非無了華眼華空眼猶有了華眼空眼無華眼不了復次一切諸法悉假因緣因緣所生皆無自性一法既爾萬法皆然境智相

後十

十三

從于何不寂何以故因緣之法性無差別故今之三界輪迴六道昇降淨穢苦樂凡聖差殊皆由三業四儀六根所對隨情造業果報不同善則受樂惡則受苦故經云善惡爲因苦樂爲果當知法無定相隨緣構集緣非我有故曰性空空故非異萬法皆如故經云色即是空四陰亦爾如是則何獨凡類緣生亦乃三乘聖果皆從緣有是故經云佛種從緣起是以萬機叢湊達之者則無非道場色像無邊悟之者則無非般若故經云色無邊故

當知般若亦無邊何以故境非智而不了智非境而不生智生則了境而生境了則智生而了智生而了了無所了了境而生生無能生生無能生則內智寂寂了無所了則外境如如如寂無差境智冥一萬累都泯妙旨存焉故經云般若無知無所不知如是則妙旨非知不知而知矣

優畢又頌第六

夫定亂分歧動靜之源莫二愚慧乖路明闇之本非殊羣迷從闇而背明捨靜而求動衆悟背動而從靜捨暗以求明明生則轉愚成慧靜立則息亂成定立由乎背動慧生因乎捨暗暗動連繫於煩籠靜明相趨於物表物不能愚功由於慧煩不能亂功由於定定慧更資於靜明愚亂相纏於暗動動而能靜

者即亂而定也暗而能明者即愚而慧也如是則暗動之本無差靜明由茲合道愚亂之源非異定慧於是同宗宗同則無緣之慈定慧則寂而常照寂而常照則雙與無緣之慈則雙奪雙奪故優畢又雙與故毗婆奢摩以奢摩他故雖寂而常照以毗婆舍那故雖照而常寂以優畢又故非照而非寂照而常寂故說俗而即真寂而常照故說真而即俗非寂非照故杜口於毗耶復次觀心十門初則言其法爾次則出其觀體三則語其相應四則警其上慢五則誠其疎怠六則重出觀體七則明其是非八則簡其詮旨九則觸途成觀十則妙契玄源第一言其法爾者夫心性虛通動靜之源莫二真如絕慮緣計之念非殊惑見紛馳窮之則惟一寂靈源不狀鑑之

則以千差千差不同法眼之名自立一寂非異慧眼之號斯存理量雙消佛眼之功圓著是以三諦一境法身之理恒清三智一心般若之明常照境智冥合解脫之應隨機非縱非橫圓伊之道玄會故知三德妙性宛爾無乖一心深廣難思何出要而非路是以即心爲道者可謂尋流而得源矣第二出其觀體者祇知一念即空不空非空非不空第三語其相應者心與空相應則譏毀讚譽何憂何喜身與空相應則刀割香塗何苦何樂依報與空相應則施與劫奪何得何失心與空不空相應則愛見都忘慈悲溥救身與空不空相應則內同枯木外現威儀依報與空不空相應則永絕貪求資財給濟心與空不空非空非不空相應則實相初明開佛知見身與

空不空非空非不空相應則一塵入正受諸塵三昧起依報與空不空非空非不空相應則香臺寶閣嚴土化生第四警其上慢者若不爾者則未相應也第五誠其疎怠者然渡海應須上船非船何以能渡修心必須入觀非觀無以明心心尚未明相應何日思之勿自恃也第六重出觀體者只知一念即空不空非有非無不知即念即空不空非非有非非無第七明其是非者心不是有心不是無心不非有心不非無是有是無即墮是非有非無即墮非如是祇是是非之非未是非是非非之是今以雙非破兩是是破非是猶是非又以雙非破兩非非破非非即是如是如是祇是非是非非之是未是非不非不非不是不不是是非之惑綿微難見神清慮靜細而

研之第八簡其詮旨者然而至理無言假文言以明其旨旨宗非觀藉修觀以會其宗若旨之未明則言之未的若宗之未會則觀之未深深觀乃會其宗的言必明其旨旨宗既其明會言觀何得復存耶第九觸途成觀者夫再演言詞重標觀體欲明宗旨無異言觀有逐方移移言則言理無差改觀則觀旨不異不異之旨即理無差之理即宗旨旨一而二名言觀明其弄引耳第十妙契玄源者夫悟心之士寧執觀而迷旨達教之人豈滯言

俊十

十六

而惑理理明則言語道斷何言之能議旨會則心行處滅何觀之能思心言不能思議者可謂妙契寰中矣

三乘漸次第七

夫妙道冲微理絕名相之表至真虛寂量超

羣數之外而能無緣之慈隨有機而感應不二之旨逐根性以區分順物忘懷施而不作終日說示不異無言設教多途無乖一揆是以大聖慈悲隨機利物統其幽致羣籍非殊中下之流觀諦緣而自小高上之士御六度而成大由是品類愚迷無能自曉或因說而悟解故號聲聞原其所修四諦而爲本行觀無常而生恐念空寂以求安患六道之輪迴惡三界之生死見苦常懷厭離斷集恒畏其生證滅獨契無爲修道惟論自度大誓之心未普攝化之道無施六和之敬空然三界之慈靡運因乖萬行果闕圓常六度未修非小何類如是則聲聞之道也或有不因他說自悟非常偶緣散而體真故名緣覺原其所習十二因緣而爲本行觀無明而即空達諸行

後十

十七

而無作二因既非其業五果之報何酬愛取有以無疵老死亦何所累故能翛然獨脫靜處幽居觀物變而悟非常觀秋零而入真道四儀庠序攝心慮以恬愉性好單棲慙閑林而自適不欣說法現神力以化他無佛之世出興作佛燈之後焰身唯善寂意翫清虛獨宿孤峯觀緣散滅利他不普自益未圓於下有勝於上不足兩非其類位處中乘如此辟支佛道也如其根性本明玄功宿著學非博涉解自生知心無所緣而能利物慈悲至大愛見之所不拘終日度生不見生之可度一異齊旨解惑同源人法俱空故名菩薩原其所修六度而爲正因行施則盡命傾財持戒則吉羅無犯忍辱則深明非我割截何傷安耐毀譽八風不動精進則勤求至道如救頭

然自行化他刹那之頃無間禪那則身心寂  
怕安般希微住寂定以目資運四儀而利物  
智慧則了知緣起自性無生萬法皆如真源  
至寂雖知煩惱無可捨菩提無可取而能不  
證無爲度生長劫廣修萬行等觀羣方下及  
諦緣上該不共大誓之心普被四攝之道通  
收總三界以爲家括四生而爲子悲智雙運  
福慧兩嚴超越二乘獨居其上如是則大乘  
之道也是以一真之理逐根性以階差取益  
隨機三乘之唱備矣然而至理虛玄窮微絕  
妙尚非其一何是於三不三之三而言三不  
一之一而言一一三非三尚不三三一非一  
亦何一一不一自非三三不三自非一非一  
一非三不留非三三非一不立不立之一本  
無三不留之三本無一一三本無無亦無無

無無本故妙絕如是則一何所分三何所合  
合分自於人耳何理異於言或譬夫三獸渡  
河河一寧從獸合復何獨河非獸合亦乃獸  
不河分河尚不成三河豈得以河而合獸獸  
尚不成一獸豈得以獸而成河河非獸而何  
三獸非河而何一一河獨包三獸而河未曾  
三三獸共履一河而獸未嘗一獸之非一明  
其足有短長河之不三知其水無深淺水無  
深淺譬法之無差足有短長類智之有明昧  
如是則法本無三而人自三耳今之三乘之  
初四諦最標其首法之既以無差四諦亦何  
非大而言聲聞觀之位居其小者哉是知諦  
似於河人之若獸聲聞最劣與兔爲儔雖復  
奔波寧窮浪底未能知其深極位自居卑何  
必觀諦之流一繫同其成小如其智照高明

後十

十八

量齊香象者則可以窮源盡際煥然成大矣  
故知下智觀者得聲聞果中智觀者得緣覺  
果上智觀者得菩薩果明宗皎然豈容圖度  
者矣是以聲聞見苦而斷集緣覺悟集散而  
觀離菩薩了達真源知集本無和合三人同

後十

十九

觀四諦證果之所差殊良由觀有淺深對照  
明其高下耳是以下乘行下中上之所未修  
上乘行上而修中下中行中下不修於上上  
中下之在人非諦令其大小耳然三乘雖殊  
同歸出苦之要聲聞雖小見愛之惑已祛故

於三界無憂分段之形滅矣三明照耀開朗  
八萬之劫現前六通縱任無爲山壁遊之直  
度時復空中行住或坐卧之安然汎沼則輕  
若鴻毛涉地則猶如履水九定之功滿足十  
八之變隨心然三藏之佛望六根清淨位有

齊有劣同除四住此處爲齊若伏無明三藏  
則劣佛尚爲劣二乘可知望上斷伏雖殊於  
下悟迷有隔如是則二乘何欲而欲不修者  
哉如來爲對大根引歸寶所令修種智同契  
圓伊或毀或譽抑揚當時耳凡夫不了預畏  
被呵寧知見愛尚存去二乘而甚遠雖復言  
其修道惑使諸所不祛非唯身口未端亦乃  
心由諂曲見生自意解背真詮聖教之所不  
依明師未曾承受根緣非唯宿習見解未預  
生知而能世智辯聰談論以之終日時復牽  
於經語曲會私情縱邪說以誑愚人撥因果  
而排罪福順情則嬉怡生愛違意則愀惻懷  
瞋三受之狀固然稱位乃儔菩薩初篇之非  
未免過人之譽又繁大乘之所不修而復譏  
於小學恣一時之強口謗說之患鏗然三塗

苦輪報之長劫哀哉吁哉言及愴然悲酸矣然而達性之人對境彌加其照忘心之士相善不涉其懷況乎三業之邪非寧有歷心於塵滴是以鑑玄之侶淨三受於心源滌穢之流掃七支於身口無情罔侵塵業有識無惱

後十

三

蛸螟幽澗未足比其清飛雪無以方其素眷德若羽羣揚翅望星月以窮高棄惡若鱗衆驚鈎投江瀛而盡底玄曦慙其照遠上界惡以緣消境智合以圓虛定慧均而等妙桑田改而心無易海嶽遷而志不移而能處憤非喧凝神挺照心源朗淨慧解無方觀法性而達真如鑑金文而依了義如是則一念之中何法門而不具如其妙慧未彰心無準的解非契理行闕起塵乖法性而順常情背圓詮而執權說如是則次第隨機對根緣而設教

矣是以敘其綱紀委悉餘所未明深淺宗途畧言其趣三乘之學影響知其分位耳

事理不二第八

夫妙悟通衢則山河非壅迷名滯相則絲毫成隔然萬法本源由來實相塵沙惑趣原是

真宗故物像無邊般若無際者以其法性本真了達成智故也譬夫行由通徑則萬里可期如其觸物衝渠則終朝域內以其不知物有無形之畔渠有窮虛之域故也是以學遊中道則實相可期如其執有滯無則終歸邊

後十

三十一

見以其不知有有非有之相無有非無之實故也今之色像紛紜窮之則非相音聲吼喚究之則無言迷之則謂有形聲悟之則知其聞寂如是則真諦不乖於事理即事理之體元真妙智不異於了知即了知之性元智然

而妙旨絕言假文言以詮旨真宗非相假名  
相以標宗譬夫象非雪山假雪山而類象若  
此但取其能類耳豈以雪山而爲象耶今之  
法非常而執有假非有以破常性非斷而執  
無假非無而破斷類夫淨非水灰假水灰而  
洗淨者此但取其能洗耳豈以水灰而爲淨  
耶故知中道不偏假二邊而辨正斷常非是  
寄無有以明非若有若無言既非非有非無  
亦何是信知妙達玄源者非常情之所測也  
何者夫妄非愚出真不智生達妄名真迷真  
曰妄豈有妄隨愚變真逐智迴真妄不差愚  
智自異耳夫欲妙識玄宗必先審其愚智若  
欲審其愚智善須明其真妄若欲明其真妄  
復當究其名體名體若分真妄自辨真妄既  
辨愚智迢然是以愚無了智之能智有達愚

之實故知非智無以明其真妄非智莫能辨  
其名體何者或有名而無體或因體而施名  
名體混緒實難窮究矣是以體非名而不辨  
名非體而不施言體必假其名語名必藉其  
體今之體外施名者此但名其無體耳豈有  
體當其名耶譬夫兔無角而施名此則名其  
無角耳豈有角當其名耶無體而施名者則  
名無實名也名無實名則所名無也所名既  
無能名不有也何者設名本以名其體無體  
何以當其名言體本以當其名無名何以當  
其體體無當而非體名無名而非名此則何  
獨體而元虛亦乃名而本寂也然而無體當  
名由來若此名之有當何所云爲夫體不自  
名假他名而名我體名非自設假他體以施  
我名若體之未形則名何所名若名之未設

則體何所明然而明體雖假其名不爲不名而無體耳設名要因其體無體則名之本無如是則體不名生名生於體耳今之體在名前名從體後辨者如此則設名以名其體故知體是名源耳則名之所由緣起於體體之

元緒何所因依夫體不我形假緣會而成體緣非我會因會體而成緣若體之未形則緣何所會若緣之未會則體何所形體形則緣會而形緣會則體形而會體形而會則明形無別會形無別會則會本無也緣會而形則明會無別形會無別形則形本無也是以萬法從緣無自體耳體而無自故名性空性之既空雖緣會而非有緣之既會雖性空而不無是以緣會之有有而非有性空之無無而不無何者會即性空故言非有空即緣會故

曰非無今言不有不無者非是離有別有一無也亦非離無別有一有也如是則明法非有無故以非有非無名耳不是非有非無既非有無又非非有非非無也如是何獨言語道斷亦乃心行處滅也

勸友人書第九

婺州浦陽縣佐溪山朗禪師召大師山居書自到靈溪泰然心意高低峯頂振錫常遊石室巖龕拂手宴坐青松碧沼明月自生風掃白雲縱目千里名華香果蜂鳥嚙將猿嘯長吟遠近皆聽鋤頭當枕細草爲氍毹世上崢嶸競爭人我心未達方乃如斯儻有寸陰願垂相訪

大師答書

自別已來經今數載遙心眷想時復成勞忽

奉來書適然無慮不委信後道體如何法味  
資神故應清樂也玄覺粗得延時欽詠德音  
非言可述承懷節操獨處幽棲泯跡人間潛  
形山谷親朋絕往鳥獸時遊竟夜綿綿終朝  
寂寂視聽都息心累閒然獨宿孤峯端居樹

下息繁餐道誠合如之然而正道寂寥雖有  
修而難會邪徒喧擾乃無習而易親若非解  
契玄宗行符真趣者則未可幽居抱拙自謂  
一生歟應當博問先知服膺誠懇執掌屈膝  
整意端容曉夜忘疲始終虔仰折挫身口蠲  
矜怠慢不顧形骸專精至道者可謂澄神方  
寸歟夫欲採妙探玄實非容易決擇之次如  
履輕冰必須側耳目而奉玄音肅情塵而賞  
幽致忘言宴旨濯累餐微夕惕朝詢不濫絲  
髮如是則乃可潛形山谷寂慮絕羣哉其或

心徑未通矚物成壅而欲避喧求靜者盡世  
未有其方況乎鬱鬱長林峩峩聳峭鳥獸鳴  
咽松竹森梢水石崢嶸風枝蕭索藤蘿縈絆  
雲霧氤氲節物衰榮晨昏眩晃斯之種類豈  
非喧雜耶故知見惑尚紆觸途成滯耳是以

先須識道後乃居山若未識道而先居山者  
但見其山必忘其道若未居山而先識道者  
但見其道必忘其山忘山則道性怡神忘道  
則山形眩目是以見道忘山者人間亦寂也  
見山忘道者山中乃喧也必能了陰無我無  
我誰住人間若知陰入如空空聚何殊山谷  
如其三毒未祛六塵尚擾身心自相矛盾何  
關人山之喧寂耶且夫道性冲虛萬物本非  
其累真慈平等聲色何非道乎特因見倒惑  
生遂成輪轉耳若能了境非有觸目無非道

後十

二十四

場知了本無所以不緣而照圓融法界解惑何殊以含靈而辨悲即想念而明智智生則法應圓照離境何以觀悲悲智理合通收乖生何以能度度盡生而悲大照窮境以智圓智圓則喧寂同觀悲大則怨親普救如是則

後十

二十五

何假長居山谷隨處任緣哉況乎法法虛融心心寂滅本自非有誰強言無可喧擾之可喧何寂靜之可寂若知物我冥一彼此無非道場復何徇喧雜於人間散寂寞於山谷是以釋動求靜者憎枷愛杻也離怨求親者厭檻欣籠也若能慕寂於喧市鄙無非宴坐微違納順怨債由來善友矣如是則劫奪毀辱何曾非我本師叫喚喧煩無非寂滅故知妙道無形萬像不乖其致真如寂滅衆響靡異其源迷之則見倒惑生悟之則違順無地閒

寂非有緣會而能生我疑非無緣散而能滅滅既非滅以何滅滅生既非生以何生生滅既虛實相常住矣是以定水滔滔何念塵而不洗智燈了了何惑霧而不祛乖之則六趣循環會之則三途迥出如是則何不乘慧舟而遊法海而欲駕折軸於山谷者哉故知物類紘紘其性自一靈源寂寂不照而知實相天真靈智非造人迷謂之失人悟謂之得得失在於人何關動靜者乎譬夫未解乘舟而欲怨其水曲者哉若能妙識玄宗虛心冥契動靜常矩語默恒規寂爾有歸恬然無間如是則乃可逍遙山谷放曠郊鄙遊逸形儀寂怕心腑恬淡息於內蕭散揚於外其身兮若拘其心兮若泰現形容於寰宇潛幽靈於法界如是則應機有感適然無準矣因信畧

此餘更何申若非志朋安敢輕觸宴寂之暇  
時暫思量予必誑言無當看竟迴充紙燼耳  
不宣同友玄覺和南

發願文第十

稽首圓滿徧知覺寂靜平等本真源相好嚴

後十

二十六

特非有無慧明普照微塵刹稽首湛然真妙  
覺甚深十二修多羅非文非字非言詮一音  
隨類皆明了稽首清淨諸賢聖十方和合應  
真僧執持禁戒無有違振錫攜瓶利含識卵  
生胎生及溼化有色無色想非想非有非無  
想雜類六道輪迴不暫停我今稽首歸三寶  
普爲衆生發道心羣生沈淪苦海中願因諸  
佛法僧力慈悲方便拔諸苦不捨弘願濟舍  
靈化力自在度無窮恒沙衆生成正覺說此  
偈已我復稽首歸依十方三世一切諸佛法

僧前承三寶力志心發願修無上菩提契從  
今生至成正覺中間決定勤求不退未得道  
前身無橫病壽不中天正命盡時不見惡相  
無諸恐怖不生顛倒身無苦痛心不散亂正  
慧明了不經中陰不入地獄畜生餓鬼水陸  
空行天魔外道幽冥鬼神一切雜形皆悉不  
受長得人身聰明正直不生惡國不值惡王  
不生邊地不受貧苦奴婢女形黃門二根黃  
髮黑齒頑愚暗鈍醜陋殘缺盲聾瘖瘂凡是  
可惡畢竟不生出處中國正信家生常得男  
後十  
身六根完具端正香潔無諸垢穢志意和雅  
二十七  
身安心靜不貪瞋癡三毒永斷不造衆惡恒  
思諸善不作王臣不爲使命不願榮飾安貧  
度世少欲知足不長畜積衣食供身不行偷  
盜不殺衆生不噉魚肉敬愛含識如我無異

性行柔軟不求人過不稱己善不與物諍怨親平等不起分別不生憎愛他物不希自財不憍不樂侵犯恒懷質直心不卒暴常樂謙下口無惡說身無惡行心不諂曲三業清淨在處安隱無諸障難竊盜劫賊王法牢獄枷杖鉤鎖刀鎗箭槊猛獸毒蟲墮峯溺水火燒風飄雷驚霹靂樹折巖頽堂崩棟朽燬打怖畏赴逐圍遶執捉繫縛加誣毀謗橫註鉤牽凡諸難事一切不受惡鬼飛災天行毒癘邪魔魍魎若河若海崇山穹嶽居止樹神凡是靈祇聞我名者見我形者發菩提心悉相覆護不相侵惱晝夜安隱無諸驚懼四大康強六根清淨不染六塵心無亂想不有昏滯不生斷見不著空有遠離諸相信奉能仁不執已見悟解明了生生修習正慧堅固不被魔

攝大命終時安然快樂捨身受身無有怨對一切衆生同爲善友所生之處值佛聞法童真出家爲僧和合身身之服不離袈裟食食之器不乖孟鉢道心堅固不生憍慢敬重三寶常修梵行親近明師隨善知識深信正法勤行六度讀誦大乘行道禮拜妙味香華音聲讚唄燈燭臺觀山海林泉空中平地世間所有微塵已上悉持供養合集功德迴助菩提思惟了義志樂閑靜清素寂默不受喧擾不樂羣居常好獨處一切無求專心定慧六通具足化度衆生隨心所願自在無礙萬行成就精妙無窮正直圓明志成佛道願以此善根普及十方界上窮有頂下極風輪天上人間六道諸身一切含識我所有功德悉與衆生共盡於微塵劫不惟一衆生隨我有善

根普皆充熏飾地獄中苦惱南無佛法僧稱  
佛法僧名願皆蒙解脫餓鬼中苦惱南無佛  
法僧稱佛法僧名願皆蒙解脫畜生中苦惱  
南無佛法僧稱佛法僧名願皆蒙解脫天人  
阿修羅恒沙諸含識八苦相煎迫南無佛法  
僧因我此善根普免諸纏縛南無三世佛南  
無修多羅菩薩聲聞僧微塵諸聖衆不捨本  
慈悲攝受羣生類盡空諸含識歸依佛法僧  
離苦出三塗疾得超三界各發菩提心晝夜  
行般若生生勤精進常如救頭然先得菩提  
時誓願相救脫我行道禮拜我誦經念佛我  
修戒定慧南無佛法僧普願諸衆生悉皆成  
佛道我等諸含識堅固求菩提頂禮佛法僧  
願早成正覺

永嘉集

卷十

二十九

永嘉證道歌

唐慎水沙門玄覺撰

君不見絕學無爲閒道人，不除妄想不求真。  
無明實性卽佛性，幻化空身卽法身。法身覺  
了無一物，本源自性天真佛。五陰浮雲空去  
來，三毒水泡虛出沒。證實相，無人法，剎那滅  
却阿鼻業。若將妄語誑衆生，自招拔舌塵沙  
劫。頓覺了如來，禪六度，萬行體中圓。夢裏明  
明有六趣，覺後空空無大千。無罪福無損益  
寂滅性中莫問覓，比來塵鏡未曾磨。今日分  
明須剖析，誰無念，誰無生。若實無生無不生，  
喚取機關木人問。求佛施功早晚成，放四大  
莫把捉。寂滅性中隨飲啄，諸行無常一切空。  
卽是如來大圓覺，決定說表真僧有人不肯。  
任情徵直截，根源佛所印。摘葉尋枝我不能。

摩尼珠人不識，如來藏裏親收得。六般神用  
空不空，一顆圓光色非色。淨五眼得五力，唯  
證乃知難可測。鏡裏看形見不難，水中捉月  
爭拈得。常獨行，常獨步，達者同遊涅槃路。調  
古神清風自高，貌頽骨剛人不顧。窮釋子口  
稱貧，實是身貧道不貧。貧則身常披縷褐，道  
則心藏無價珍。無價珍用無盡，利物應機終  
不愆。三身四智體中圓，八解六通心地印。上  
士一決一切了，中下多聞多不信。但自懷中  
解垢衣，誰能向外誇精進。從他謗，任他非，把  
火燒天徒自疲。我聞恰似飲甘露，銷融頓入  
不思議。觀惡言是功德，此卽成吾善知識。不  
因訕謗起冤親，何表無生慈忍力。宗亦通說  
亦通定，慧圓明不滯空。非但我今獨達了，恒  
沙諸佛體皆同。師子吼無畏，說百獸聞之皆

腦裂香象奔波失却威天龍寂聽生欣悅遊  
江海涉山川尋師訪道爲參禪自從認得曹  
谿路了知生死不相關行亦禪坐亦禪語默  
動靜體安然縱遇鋒刀常坦坦假饒毒藥也  
閒閒我師得見然燈佛多劫曾爲忍辱仙幾

迴生幾迴死生死悠悠無定止自從頓悟了  
無生於諸榮辱何憂喜入深山住蘭若岑峯  
幽遠長松下優游靜坐坐僧家閒寂安居實  
蕭灑覺卽了不施功一切有爲法不同住相  
布施生天福猶如仰箭射虛空勢力盡箭還  
墜招得來生不如意爭似無爲實相門一起  
直入如來地但得本莫愁末如淨瑠璃含寶  
月既能解此如意珠自利利他終不竭江月  
照松風吹永夜清宵何所爲佛性戒珠心地  
印霧露雲霞體上衣降龍鉢解虎錫兩鉗金

環鳴歷歷不是標形虛事持如來寶杖親踪  
跡不求真不斷妄了知二法空無相無相無  
空無不空卽是如來真實相心鏡明鑒無礙  
廓然瑩徹周沙界萬象森羅影現中一顆圓  
光非內外豁達空撥因果莽莽蕩蕩招殃禍

使子

三

棄有著空病亦然還如避溺而投火捨妄心  
取真理取捨之心成巧僞學人不了用修行  
深成認賊將爲子損法財滅功德莫不由斯  
心意識是以禪門了却心頓入無生知見力  
大丈夫秉慧劍般若鋒兮金剛燄非但空摧  
外道心早曾落却天魔膽震法雷擊法鼓布  
慈雲今灑甘露龍象蹴踏潤無邊三乘五性  
皆醒悟雪山肥膩更無雜純出醍醐我常納  
一性圓通一切性一法徧含一切法一月普  
現一切水一切水月一月攝諸佛法身入我

性我性同共如來合一地具足一切地非色  
非心非行業彈指圖成八萬門刹那滅却三  
祇劫一切數句非數句與吾靈覺何交涉不  
可毀不可讚體若虛空勿涯岸不離當處常  
湛然覓卽知君不可見取不得捨不得不可  
得中只麼得默時說說時默大施門開無壅  
塞有人問我解何宗報道摩訶般若力或是  
或非人不識逆行順行天莫測吾早曾經多  
劫修不是等閒相誑惑建法幢立宗旨明明  
佛敕曹溪是第一迦葉首傳燈二十八代西  
天記法東流入此土菩提達摩爲初祖六代  
傳衣天下聞後人得道何窮數真不立妄本  
空有無俱遣不空空二十空門元不著一性  
如來體自同心是根法是塵兩種猶如鏡上  
痕痕垢盡除光始現心法雙忘性卽真嗟未

法惡時世衆生福薄難調制去聖遠兮邪見  
深魔強法弱多怨害聞說如來頓教門恨不  
滅除令瓦碎作在心殃在身不須冤訴更尤  
人欲得不招無間業莫謗如來正法輪旃檀  
林無雜樹鬱密森沈師子住境靜林間獨自  
遊走獸飛禽皆遠去師子兒衆隨後三歲便  
能大哮吼若是野干逐法王百年妖怪虛開  
口圓頓教勿人情有疑不決直須爭不是山  
僧逞人我修行恐落斷常坑非不非是不是  
差之毫釐失千里是則龍女頓成佛非則善  
星生陷墜吾早年來積學問亦曾討疏尋經  
論分別名相不知休入海算沙徒自困却被  
如來苦訶責數他珍寶有何益從來蹭蹬覺  
虛行多年枉作風塵客種性邪錯知解不達  
如來圓頓制二乘精進勿道心外道聰明無

智慧亦愚癡亦小駭空拳指上生實解執指  
爲月枉施功根境法中虛捏怪不見一法卽  
如來方得名爲觀自在了卽業障本來空未  
了應須還夙債饑逢王膳不能食病遇醫王  
爭得瘥在欲行禪知見力火中生蓮終不壞

勇施犯重悟無生早時成佛於今在師子吼  
無畏說深嗟憐懂頑皮韌祇知犯重障菩提  
不見如來開祕訣有二比丘犯姪殺波離螢  
光增罪結維摩大士頓除疑猶如赫日銷霜  
雪不思議解脫力妙用恒沙也無極四事供  
養敢辭勞萬兩黃金亦銷得粉骨碎身未足  
酬一句了然超百億法中王最高勝恒沙如  
來同共證我今解此如意珠信受之者皆相  
應了了見無一物亦無人亦無佛大千沙界  
海中漚一切聖賢如電拂假使鐵輪頂上旋

定慧圓明終不失日可冷月可熱衆魔不能  
壞真說象駕崢嶸謾進途誰見蟾蜍能拒轍  
大象不遊於兔徑大悟不拘於小節莫將管  
見謗蒼蒼未了吾今爲君決  
永嘉證道歌

音釋

蹟士革切揜衣檢切邁市緣切檝卽葉切  
蟲尺尹切蝟吁緣切潰胡對切砣苦骨切  
極普同切懣懣懣切懣懣懣切豐許觀切  
也普同切懣懣懣切懣懣懣切豐許觀切  
閭古吳切絆博慢切訕音彰切峯陰貌  
鉗音軌駭諧上聲韌音達柔頌疾醉切  
古音軌促音駭聲諧上聲韌音達柔頌疾醉切